

可

園

詩

存

可園詩存卷五

江甯陳作霖伯雨

汜湖草上

起咸豐戊午五月迄己未十二月

戊午五月二十一日自汜水鎮泛舟至南趙莊

扁舟一葉送輕波夾岸人家總近河村徑陰濃垂柳合溪流
曲折小橋多頻年亂世干戈警何處先生安樂窩好入武陵
仙洞去桃花深處挂漁蓑

自癸丑至今所積詩文漸成卷軸今夏避亂匆匆遺失略盡
感賦一律

過眼滄桑又一場頻年擲管爲誰忙敢云文被六丁取只爲
山無二酉藏李賀嘔心原可惜張儀有舌亦何妨迂儒事業
鈔胥筆再注蟲魚補舊囊

偶成

幼弟才三歲相攜倚曲欄舉頭瞥見月指與阿兄看

夏日村居四首

村居不必卜容膝易求安有樹風裁響無山地轉寬逢農閒
晴雨見客廢衣冠南北皆浮寓何妨一例看

雨漲溪流活陰添老樹肥池魚吹沫上梁燕引雛飛來往漁
樵熟喧闐車馬稀村居原自好近市悟前非

絕口不談兵逍遙物外情雨餘蚊作市村僻樹爲城河淡欲
無影星流似有聲此鄉何所屬疑是鄭康成

薄暮追涼去柴門倚短藤螢栖沾露草犬吠隔溪燈鄉思憐

今減離愁較昔增湖隄應寂寞空自憶吟朋

謂金焦諸君

贈句容尙仰止

兆山

不向華陽采紫芝臨流結得小茅茨陰圍陶令門前柳圖仿
王維畫裏詩荷笠野人時濕跡垂髫童子正尋師仙源福地
欣同住一笑休嫌識面遲

跳神謠

敲金鉦擊土鼓村童歌村巫舞鬼魅盡驅除介福祈田祖嗚
呼世上紛紛鬼魅多無人驅除其奈何

戊午秋日書憤二十六韻

憶昔壬寅歲英夷猖獗時

聖人自神武諸帥失機宜市易通金幣波寬漏玉卮有求皆
聽納無事不羈縻欲使封疆靖翻令薄海嗤烽剛銷島嶼禍
已伏潢池大地多瘡痍陰謀暗伺窺利思收鷸蚌浪忽鼓鯨
鯢南粵屏藩任津門鎖鑰司颶風頻震盪海舶屢遷移索責

惟持券要盟尙費辭敵將和作餌誰肯戰交綏畿輔屯鴉隊
旌麾擁虎帷亞夫爲漢將展喜犒齊師屈意從其欲甘心任
所欺婚雖辭冒頓館更列波斯暫退何堪恃重來未可知設
防須及早臨事莫多疑相守于公計兵張岳字旗與其傾內
帑百萬飽蠻夷何若申軍令千金賞健兒六師時出擊片甲
不教遺大振中華氣能爲四國基外戎皆畏服內寇自離披
上策無過此迂談卻語誰賈生憂國久痛哭一陳之

七夕

牛女星輝此夜明銀河脈脈水無聲唐皇私誓汾陽祝兒女

英雄兩樣情

秋夜步月二首

三更月色明萬樹秋聲靜卻起繞林行踏碎梧桐影

橋上屐聲輕橋下溪聲靜底事魚忽驚過橋人倒影

田家五首

綠樹蔭茆屋臨水成一村數世耕且讀居然長子孫死徙不出鄉萬木皆同根相見非伯叔卽是弟與昆春秋有聚會報餐宴雞豚感茲太古風薄俗難具論

五月插晚禾六月穫早稻涼秋七八月農事尙未了日出耰板喧月明歌聲好拾穗兒童忙得粒鳥雀飽會倩迂倪筆畫作幽風藁

薄莫炊飯香老幼團團坐酒向瓦盆傾饌有藜藿位飲酣輒作歌一唱而一和陶然入醉鄉滿地縱橫臥

國學既有庠窮鄉亦有塾父老樂耕耘子弟勤誦讀奉書謹受教野貌謙而樸不必矜典墳識字聊免俗世守數頃田軒

冕非所欲

我生不逢時世亂常相昵拋卻城市居來享林泉福竹籬編
作牆稻堆高過屋忘機鷗不驚見慣犬皆熟時有老農過相
牛經共讀卽此養性真無田心亦足

星異

咸豐八年秋八月有星作作光騰空其長逾丈其色白昏見
於西旦見東我思乾象垂星變上下精誠通一綫吾

皇修德庶事永自克從容迺

天眷只恐太早言瑞不言災早朝入奏含譽見

感懷次尙仰止韻三首

瑟瑟西風雁影單關山砧杵不勝寒三秋又覺清愁起萬事
多將冷眼看閱世莊生醒蝶夢累人閑貢笑豬肝囊中賸有

焦桐在取向知音宛轉彈

欲隨漁父著州蓑製芙蓉衣製荷林密豈愁鷓逐爵堂深
應許燕營窠別來親友音書少亂裏文章感慨多莫訝身同
舟不繫曾經無限猛風波

淮右山川幾陸沈潛蹤且喜到深林夜臨曠野觀乾象曉對
清流生道心讀史自將雙眼洗敲詩且作曼聲吟任他時勢
相催促吾輩還當惜寸陰

閒遊贈仰止

秋光引閒遊步入小村次曲水繞荆扉園中無隙地槐葉染
新黃芭蕉減深翠松老屈無枝菊瘦疏有致向陽屋三間小
窗幽而邃共飲茶一甌閒繙書數笥何必問主人應接增吾
累無意得茲遊不負幽尋志壁上幸少塵君速題詩記

月夜

明月從東來溪上多清景
星大魚吞光樹搖犬吠影
澄觀萬象空獨立一心靜
夜永竟忘歸風吹衣袂冷

聞寇陷六合弔溫方伯

紹原二首

寇氛數載擾江東當道居然臥
老熊曠野戰攻曾用火嚴城
啟閉不通風睢陽外救來張
錦河內居民借寇公可奈七年
辛苦地滔滔流水條成空

劇憐四面網羅張原草荒荒古戰場
余闕孤城終莫保劉琨
百口竟同亡青燐影聚村墟冷
白骨沙埋夜月涼畢竟人心
猶不死翻傳奇策守危疆

時有傳方伯用計殺賊者

聞滁州李世忠就撫二首

軍門迎謁屬檠韃淮右從茲盼凱旋
須識受降如受敵豈真

依漢若依天撫綏應鑒熊文燦反側當防李繼遷料得元戎多偉略定能弭變在機先

降書飛報眾騰歡往事重思膽轉寒化外頑民曾革面城中大吏反刳肝庸謀已被相輕久此罪從知欲赦難世忠本降盜英山之

役殺何觀察桂珍以叛

今日又開三面網如天倍覺

聖恩寬

爲董集亭九丈

謙

題歸舟誓墓冊子

萬壑千巖看不了行人盡識山陰道鑑湖一曲明鏡開林巒四面皆環抱董侯家住湖江濱半生遊宦走風塵幡然忽動還鄉思膾作鱸魚羹作菰恩恩忙把琴書束買得扁舟歸計速蒲帆飽挂疾於飛一篙撐破晴波綠清風習習起中流乘潮安穩下邗溝空濛烟樹南徐晚罨畫樓臺茂苑秋南徐茂

苑更番度又轉錢塘江上路吳中山水有清音一路裁陵題
錦句迴憶離家數十載須眉漸逐青春改從今誓學王右軍
約辭一定如山海挈榼提壺墓上來葱葱鬱鬱氣佳哉千尋
華表衝霄漢一片冬青覆夜臺春露秋霜情曷已敬恭不覺
生桑梓某山某水尋釣遊還鄉之樂有如此願我有家江水
頭祖宗隴墓鬱松楸烽烟滿目歸不得披君此圖三歎息
十一月十五日集亭丈招飲感淮南舊遊二首

頻歲相邀月色新與君同是座中賓豈知今夕聯歡會更爲
良宵作主人蠟炬燒殘天未曙金樽引滿座皆春不堪回首
濠境滿眼兵戈滿地塵

新詩重向醉中聽千里相隨月滿庭行帙叢殘搜舊草故人
聚散感浮萍淮流波浪掀天白江左家山繞郭青料得今宵

同悵望幾人橐筆賦雲停

鼎泉丈在泗子鳴畏知丈在浦允中在府樸之在天長

浦口亂後喜晤金子鳴

步鑾

浮家驚燧火避地走風塵自訴別來事頻傷亂後身君真意外遇我本劫餘人痛定還思痛相看各愴神

與浦雲夜話

西窗翦燭話纏綿直到三更尙未眠風勁有聲雪在地星稀無影月當天壯心慷慨憂時事生計蕭條誤少年廡下賃春

君莫笑梁鴻本是漢高賢

時寓居礧屋中

已未正月間鳳陽賊張滌有就撫之意

妙算何須七縱禽招安爵賞重懸金狄青正奪崑崙日唐賽

先懷歸附心

上元日賊妻柳詣勝營定議

猛虎出山猶有勢飛鴉食甚欲

懷音元戎上策無逾此寂寂軍門畫角沈

大妹于歸周氏詩以送之二首

桃花灼灼映朝暄。簫鼓聲中擁彩軒。相贈翻慚無竹筥。此行

好爲潔蘋蘩。道南公瑾居同宅。

時同寓趙莊

徐北豐村世結婚家。

與周氏聯姻四世矣

莫爲別親頻灑淚。兩家俱可奉晨昏。

左芬生小習閨儀。酒譜茶經熟讀時。此日催妝剛送汝。當年

識字忝爲師。晴窗戲仿簪花格。香閣閒繙咏絮詩。休把聰明

傲夫壻。郎君才調我深知。

調浦雲

聞寇陷盱眙。追憶舊遊感傷時事懷吳允中。

堯法

焦芝圃

賢

補

三百六十字

憶昔盱眙住仙境。比蓬瀛同懷六七人。俯仰覺有情。湖光與
山色一氣含。空青雨後飛。泉出鏗鏘珠。亂鳴登高呼。明月冷
浸玻璃亭。閬闔萬餘家。隨峰勢。峻嶒美人列。屋居灼灼桃李

英絲竹一聲動歌喉轉嬌鶯歡娛殊未極風鶴慘傳聲比因
上游警道路多榛荆中丞駐淮南白日卷旆旌餉道通一綫
險要抵夷庚偏隅關大局地爲賊必爭烽火因邊熾一日常
數驚茲土不敢戀朋儕散若星諸公皆逝矣予亦從此行惟
有吳與焦履綦猶暫停相別經年久幸無烟塵生已未夏五
月天地昏且冥望氣軍皆墨壞雲如山傾士久釋甲戡附郭
無重營官但僦屋寓依山無堅城市里半秦謀草木亦晉兵
廣張三面網逐浪走長鯨勢驟風雨來襲取策自精是時大
元戎勝帥杖節守郊垌長戟十萬師誰不借威靈自從撫張
李張隆李世忠意氣何驕盈避暑水南園月明吹玉笙軍中有婦
人兵氣難飛騰賊來猶不知酣寢無探偵事急匹馬去諸軍
尙未醒忝負干城責被弄如兒嬰僵尸隨波下鬼火燭天明

蒼生竟何罪聞之涕沾纓矧我別有感西望懷良朋

題戎馬書生圖送盧九

賓臣

從軍清淮

五日北風三日雪大河地坼層冰裂白草黃沙一望平關山
迢遞人蹤絕平明伐鼓大軍行旌旆搖搖凍欲折馬蹄骨瘦
作銅聲汗氣都成寒氣結君家舊住石頭城昂藏本是一書
生平居豫蓄經綸業萬里淒涼家國情爲憐隨陸不能武慨
然有志平強虜三寸毛錐暗裏投七星寶劍空中舞鐵作兜
鍪錦作袍猿腰虎臂萬人豪翩然跨馬入營去畫角聲催夜
月高淮南江北爭馳走蓋世功名幾入手縣境遲裁潘岳花
轅門常種陶公柳今當涼風八月秋聞君又作清淮遊狂到
郗超猶入幕才如孫楚且參謀磨墨草書從盾鼻共炊浙米
借矛頭分明吳楚中原路變作窮邊一段愁吁嗟乎我生與

君本同里蠻烟瘴雨悲桑梓披君此圖未及終使我雄心陡
欲起何當杖策相從行麟閣圖形自此始

夜坐

烽烟滿日竟何如寂寂蓬廬息影初夜半聞雞眠不得燈前
倚劍註兵書

續娶趙氏催妝二首

徧覓鸞膠續鳳絃恩恩七載走風烟感卿一盞胡麻飯留我
桃源住幾年

秋高懶聽鹿鳴歌聊取瑤琴月下和也算錦標今夕奪逢人
都說小登科

四哀詩

夏季質表丈

君名家銑上元諸生咸豐癸丑陷於城中
作詩罵賊爲賊所得馬裂尸死妻亦被害

蒼頡造文字鬼神乃夜哭天地精華開便是危機伏夏君本
通儒論文逾老宿蜚聲庠序間咳唾成珠玉博物君子才清
時定蒙福金陵突瓦解進退真維谷感事作詩歌憤懣抒衷
曲余時心憂之忌諱恐相觸果爲賊所覺械繫加五木未開
三面網竟起同文獄是時張典籍庚繼妙計久蘊蓄翻城應外
兵將披賊心腹其謀忽漏洩壯士多遭戮疑君與其列鍛鍊
最慘酷竄名黨籍中遂欲夷其族輟裂不忍言孥收何太速
浩氣還太虛聞者皆歎服惟念十餘年霍家親最篤問字許
牽衣歷歷景在目文人反殺身此理不可卜一卷萍生集零
落無從錄

君陷賊中有萍生集

嚴舜芝同學

君名雋鴻江甯僧生成豐
癸丑賊陷城君全家遇害

友朋誼不同學爲最親自締嚴子交膠漆難比倫讀書聲

相續吟詩韻共分議論不稍讓心思各爭新分手每深夜覲
面總清晨卽至圍城日相離未浹旬一朝金甌破懼劫先聞
君覆巢少完卵八口無一存一死固足悲心迹尤酸辛先是
君戚誼憐君家素貧欲於出走時相攜避風塵君以有親在
苦辭奉晨昏不忍絕裾去其情亦最真胡乃遭此慘天道信
難論大抵浩劫定不能預脫身鍾山高峩峩江水碧粼粼事
經六七載感舊尙沾巾挑燈獨攻苦同志有何人

張味之茂才

君名永清江浦諸生咸豐戊午賊犯浦口君挈家避賊中道衝散不知所往

金陵古大都江浦乃屬縣秋風試院開渡江競文戰張君觀
光來足曾蓬戶踐小子年尙幼嬉戲未嘗見頻年客濠梁始
識先生面大腹何便幡修髯亦疏散酒量雅而豪詩情烹復
鍊呼我爲小友宏獎未曾倦避亂沿淮行盱山又留戀南園

花千叢長堤月一片泉清瀉玻璃湖平鋪匹練同志六七人
乘輿正游玩上游忽報警催兵傳羽箭君動歸與心料理書
與硯尊鱸肯還鄉驂騑不戀棧豈知故園中滄桑又一變攜
家避黃中骨肉顧難徧妻竟喪窮泉子幸渡北岸惟君未濟
河欲作孟側殿從此音信乖存亡竟莫判但恐已捐生不慣
經離亂臆說終無憑疑信尙參半人生當此時更比浮雲幻
山陽賦一篇讀罷再三歎

錢樸之貳尹

君名壽昌上元人以軍功得官縣丞游幕天長咸豐戊午遇賊死

錢君人中豪與我同鄉土其初不相識相識在淮浦一見若
素交精爽在眉宇口作懸河流氣似長虹吐個儻與眾殊風
流遭世忤時方揚州還長揖辭軍府參謀羨子荆冶遊真小
村需次一官微俗吏羞與伍蹉跎不得志濠上且羈旅入幕

亦窮途漫云襄治譜賴此朋盍簪聊慰飄泊苦春花開酒尊
夜月揮松塵賤子廁其閒時復相爾汝驥尾許集蠅犢生那
畏虎涉筆事謳吟騷壇分旗鼓方期樂未央風月常爲主半
夜忽傳烽人心難安堵我來汜湖濱君入南山阻轉徙客天
長軍書正旁午斗大一城危巨寇窺門戶蟻附俄登陴魚忙
詎脫罟熱血濺征袍白刃誰能拒獨念家山破君早黃鶴舉
避地經七年仍復遭強虜殺氣滿平原招魂向何所交情不
可忘念之淚如雨

聞董集亭九丈將有月當頂之集先以詩謝

明月當頭耀似珠先生折柬又相呼欲聯白傅新詩社怕憶
黃公舊酒壚

張味之錢樸之皆歸道山

絕調竟從良夜續風流得似往年

無倘非坡老吟懷健誰繪西園雅集圖

董九丈招飲賞月賦詩三首并懷浦雲

用月當頂三字爲韻

琉璃世界水晶闕長空萬里纖塵沒惠施聯袂曾觀濠莊鳥

閒吟思返越

君將有返越之志

五年盛會不可忘舉杯遙酌天心月

周家昆弟列成行詩才獨數次公狂今年汜湖玩明月

浦雲時在

汜鎮距

寓廿里華筵未得共飛觴滕王高閣待短序安得神風起馬

當

神仙游戲塵凡境千杯萬杯拚酩酊出門大笑不知寒天風

颯颯吹人醒何當乘月醉千場隨君共住蓬萊頂

君家有蓬萊閣

懷遠義民行

并敘

義民姓胡名本忠性慷慨好吟咏時俗以爲狂當張濬之

降也本忠知其詐以策干勝大帥大帥怒欲殺之顧家已

破遂走京師憤書時事乞同邑林侍御代奏未遂所請因

自經於鳳陽會館疏始上達大帥適以憂去此己未冬日
事也蓋聞諸楊鶴卿茂才云感歎之餘不能無詩

懷遠民懷遠民爾既未嘗立朝輔

聖君又未嘗備員爲諫臣胡爲欲將帥驕卒情無限憤萬言
剴切奏

天閭

天閭不知幾萬里當關虎豹眈眈視徒抱區區一片忠蠹帥
未去義民死義民死

天子聞蠹帥去士氣伸嗚呼陳尸衛吏魚布衣歐陽澈義民
乃得合之成一身此豈尋常豪俠尙氣人

曉出口占

雨意未成雪風聲如此驕杜門不肯出誰與破無聊且問梅

花信衝寒過板橋

雪後晚眺二首

出門何所往
矯首一長吟
殘雪白在地
夕陽紅出林
啄冰喧凍雀
爭宿墮寒禽
物理猶機械
予心澹古今

行行臨水去
路滑莫嫌遙
膠浦舟如屋
橫溪樹作橋
爛雲猶壓檻
窄港不通潮
晚飯誰家熟
炊烟一縷飄

可園詩存卷五

男詒紱孫祖同校字

可園詩存卷六

江甯陳作霖伯雨

汜湖草中

起咸豐庚申正月迄十二月

感事新樂府九首

并引

詩有樂府久矣而題不襲舊義取刺時則始於少陵盛於香山非所謂言者無罪聞者足戒乎我生不辰感傷世亂不揣固陋輒效其體爲賦者十一爲比興者十九庶無乖諷諭之旨云

噤口鴉 諷言官也

御史臺中柏其上多烏鴉啞啞枝頭叫爭宿常喧譁啼霜噪月烏鴉職不肯因循稍緘默吉報吉凶報凶未來之事懸心中昏報昏曉報曉隨時補救不可少胡乃畏此冰雪威忍寒

可園詩存

卷六

一

噤口皆依違一鴉噤百鴉瘖寂靜渾如空樹林百鴉瘖一鴉
叫聞之翻嫌多聒噪一鴉聒噪尚可嫌毋怪眾口盡欲箝請
看主人朝中退緩步委蛇垂玉佩

眠竈貓 憤情卒也

鼠子縱橫夜出晝伏苦其跳梁呼貓捕逐貓有威抑何壯貓
有爪不可抗鼠初畏攫遠相讓豈料貓性懶且驕肥魚大肉
暮復朝晚來眠向竈不管鼠子鬧鼠子翻笑伎倆窮結隊橫
行更鼓譟鼠既去貓始來捕雀食蝶何雄哉貓鼠同虐無計
阻人之畏貓勝於鼠

戴冠猴 譏納粟也

猴生點蒼山野性疏而頑本非衣冠族忽然慕衣冠慕衣冠
兮爲裝飾千方百計營求得舍我碧山棲遊彼紅塵域衆我

果核佳覓彼烟火食其性則獸其形人方期捷足據要津餽
口誰知實不易衣冠束縛眞吾累巢穴失去不能還應悔出
山爲多事何如山中高蹈流一聲長嘯山月秋

續尾貂 斥冒功也

欲得勳去從軍欲遷爵來入幕軍中幕裏何逍遙將吏人人
盡珥貂借問珥貂心安否欲語不語覺顏厚自從軍興十餘
年官兵常隨賊兵走眞賊遠颺尙不知俘馘半屬平民首居
然大捷宣露布張皇入奏實可醜牘尾署得立功士姓名相
連書某某此輩並非立功人苞苴塞破將軍門豈無沙場殺
賊者白首未得沾微恩賞罰失次有如此毋怪士卒不肯死
君門萬里那得知酬庸惟聽將軍指

天書一紙下丹霄將吏人人盡珥貂君不見此事古來有貂

尾不足續以狗

入市虎 傷招撫也

窮虎在深山負嵎頗雄猛雖云不敢攫處處設機穽虎亦畏
被禽斂氣常退屏奈何謂虎有雋才頓將四面網羅開欲收
爪牙爲我用相招同入市中來虎入市計亦得剝民脂膏供
虎食強弓毒矢不敢施萬里閭閻盡凋蝕一聲長吼高震山
獵者戰栗無人色山中猛虎知此情效尤入市肆橫行眾虎
犄角相盤踞將軍反得伏虎名我願魯人卜莊子勇氣矜隆
莫能已帖耳不受眾虎欺奮拳搏虎虎盡死

忍凍雀 惕戀土也

有雀有雀在紆干腹中飢餓身上寒雖欲飛向生處樂冰雪
浩浩路漫漫當初苦戀山頭住只道溫和能久駐隨陽豈無

鴻雁飛避風亦有爰居去怡然安樂了不知翻笑彼禽太多
慮今朝忍凍可奈何老幼應難守舊窠流離困苦無所訴四
面觸處皆網羅忍凍雀高談鎮靜何灑落不到身難自主時
不知悔卻當時錯

號寒蟲 勉安貧也

號寒蟲出五臺肌膚瘦盡毛羽摧問爾一寒胡至此雪虐風
饕幸不死昨日多文采今朝竟何在昨日矜羽儀今朝竟難
支五色斑斕笑威鳳一經迴想真如夢差喜飄零賸此身附
身之物盡無存附身物何足惜多少遭逢彈與射彈與射幸
未遭天時如此其焉逃得過且過須珍重耐心守得陽和動
貧居

淡月耿疏星柴門夜未扃挑燈妻問字煮茗客談經爐燼灰

留白氈枯色擁青貧居雖寂寞自比子雲亭

庚申正月晦日清江告警將移居興化聞寇退而止

移家原善策底事我盤桓亂世偷生易窮途覓食難馬驚偏
戀棲雁叫苦驚寒似說淮陰將蒼黃已築壇

紙鳶二首

毛質排風那易知紙糊竹削共相嗤若教仰面人爭看定在
青雲得路時

敢說春風得最先鸞飄鳳泊實堪憐高飛遠舉非無志爭奈
兒童一綫牽

春雪

帶甲滿東南兵氣久騷屑肅殺之所感釀成三月雪柳溼絮
還飄梨開花欲折冰結野水明凍堅厚地裂團手冷尙僵圍

爐寒復烈我思頻年來災異不可說日月屢剝蝕彗孛常明
徹天心最仁愛告警機先洩慘淡變春和亢旱補冬缺茲雪
信爲美可惜失時節

狂風

我願賢相出大風揚塵埃治世如軒轅英才應夢來否則如
漢代大風起高臺猛士守四方妖氛一掃開胡爲吼不已震
盪徒雄哉勁拔木薈蔚寒勒花胚胎勢急飛驚沙聲喧疑迅
雷連朝復累月過盛將爲災坐令爰居鳥遠避魯門隈又無
鐘鼓饗激烈使心哀

鳳陽賊平送董九丈

謙赴淮南

聞道鍾離郡妖氛一掃殘天誅今日伏人骨滿城寒狡獪終
何益淒涼不忍看羨翁眞矍鑠匹馬向淮干

看雜戲有作

湖村風日清場開鏡面平
場中演雜戲擊鼓敲金鉦
敲金擊鼓聲洋溢兩人荷木相對立
一人攀木盤復旋初似耽韃勢
微急遠看漸覺不見人但聞一片風聲疾
綠檀之技已足稱一寶斗大更通靈
童子翻身猛一躍縮入冷謙琉璃瓶
復有口中吐烟火呼吸之間雲霧鎖翻疑
爾今忽熱中氣焰逼人非故我魚龍曼衍
百戲呈登場二女何嫵婷翩躚互進雙飛
燕抗隊清歌百轉鶯聲身捷竟追猿狖掉
尾勢若爭蜻蜓反腰貼地弓彎巧舞掌留
仙鎖骨輕顛倒縱橫看未了高臺忽落雙
鉤悄金鼓一霎寂無聲空際眼花猶繚繞
我亦逢場觀戲人承平迴憶舊時因
年年角觝江南地歌舞繁華到處春
庚申三月感江南事三首

江南糜爛不堪思都護今番又潰師城下頓兵終必敗營中
乏食斷難支勃平空有交驩意漢賊從無兩立時只爲局中
先著失無端輸卻一盤棋

句曲山高時半空三軍餉道此間通爪牙豈料全無備腹背
從知總受攻差喜魚忙能漏網休矜馬快善趨風連營百里
皆焚盡枉說三年戰伐功

誰知此賊太披猖千里馳驅大戰場宗弼才看趨廣德令贊
又復救南唐賊陷廣德趨杭州還破句溧以救城賊城中國獸猶能鬪封外貪
狼更莫當一帶長濠圍不住念家山唱月荒涼

寄焦芝圃宿州

君才本是阮元瑜記室生涯暫屈居後會不知何日慰相思
已歷兩年餘荷離大道晨盤馬汜水名湖夜釣魚今夕因逢

阿連便挑燈聊寄一封書

哀江南後曲

江南奧區難比附大都小邑紛無數就中財賦誰最多蘇州
遙接杭州路憶昔金陵初陷城風聲鶴唳幾回驚半壁依然
郭郭在六年不見烟塵生傳烽未到羣相慶繁華更比當時
盛鈴轅聽鼓五千官版籍列名十萬姓大道通衢處處同車
如流水馬如龍金錢比屋經商市閭閻連雲土木功臺閣玲
瓏山水好鎮日冶遊看不了瀛海樓觀八月濤武邱路踏三
春草拾翠尋芳入狹斜吳娃越豔幾人家筵間舞愛雙垂手
陌上花迎七寶車何處哀絲兼豪竹梨園子弟顏如玉七尺
軀餽開戲場兩行畫燭調清曲莫言勝地太歡娛賴此東南
富厚區下爲大軍籌餉食上供天府轉糧儲其間施予亦慨

憫流民多少資培養郊原戴德免鴻敷

蘇州設難民局

棘院借人張

虎榜

己未科江南借浙開鄉試

慣誇文物與聲明咫尺屯營正戰爭豈以

偷安爲得計緣何絕口不談兵都護上游開幕府壕成萬里

守門戶軍令中宵肅鵲鵲河山指日收龍虎共恃長城不復

憂臨安那料破金甌一方劫慘紅羊度二月霜高白鴈秋

二月

二十七日廣

德賊犯杭州錢唐江上塵氛擾茂苑城頭防禦少唇亡方慮

輔車寒眼穿恰喜援兵到

提督張玉良由蘇援杭

敵人狡猾暫逃歸裨

將巍峩且駐師列郡分防難弛備督師根本突遭危

賊覘知南營兵

動由廣德

同撰金陵征雲慘淡風號怒建康自徹東山戍要途連失五

堅城潰卒誰憐九節度白草黃沙古戰場大星夜隕耿光芒

城亡殉節嗟余闕

徐中丞死於蘇州

事急捐生恨嗣昌

督師和春死於潯墅

網張

四面魚難漏誰敢挫戈猶格關果然天地盡櫟槍浪說乾坤

可園詩存

卷六

六

同錦繡生靈可奈被虔劉子女貴財定徧搜燕雀頻年棲幕

樂鹿麋一旦上臺遊

四月十五日
蘇州太守

去秋我若武林去山川城

邑猶如故吳江東下淞江波一路風光恣盼顧今日茫茫悔
已遲好遊真是負心期半年事倏同冰解大厦頽難仗木支
滄桑變幻原天意乾淨幾無一塊地流離困苦不須論定似
金陵初陷事殺氣連天掃不開側身遠望強登臺劍池烟月
西湖水併作江南一段哀

江南總統行 弔張軍門國樑也

江南總統真偉人喑鳴叱咤生風雲李勣少爲無賴賊嚴顏
肯作降將軍從戎嶺嶠達江滸匹馬單槍先卒伍練成鷁隊
學沙陀博得虎癡名許褚房家太尉敗陳濤新置元戎秉節
旄不敢胸中生芥蒂依然麾下列弓刀禽渠搗穴功將就卻

從轉戰三年後兵有先聲易奪人賊無餉食空思關金陵郭
外鑿深壕卅里程途一匝遭陣勢長蛇憑擊應城中匹馬禁
奔逃高高樓堞何嚴峻坐甲韜弓資靜鎮方幸齊封聚族殲
豈期曼伯潛軍進受敵從知腹背俱椎牛誓眾膽猶麤那堪
糧靳袁公路只得奔同孟大夫京口偏隅難久駐丹陽控制
三吳路指揮殘卒結荒營猶憶當年血戰處舊事茫茫感逝
波今朝大勢竟如何時來千里能傳檄運去三軍盡倒戈夜
半鼙鼙鼓聲死大敵如潮迎面起裹瘡搏戰任通中一領征
袍血花紫保障東南力不支我今不死欲何爲孤城便是王
熊豕殘局誰收謝傅棋傳來消息人皆泣良將可憐難再得
習膽翻思作盜時捐軀卽是酬

思日吁嗟乎一死休云總化塵鴻毛卻與太山分君不見忌
可園詩存

功頻掣肘黃金生嚼是何人

積雨

一雨竟三日鳴蛙到處喧雷聲隨電疾風勢挾雲奔牀漏宵
圍被泥深晝閉門絳芸隨意爇香燼鼎猶溫

新晴

漏天誰補就一笑出柴門遮日雲無影平堤水有痕蟬吟千
樹亂鴨攪一川渾無意逢鄰叟閒將農事論

水車

鞭轡運轉巧如何作苦匆忙尙踏歌沸浪聲喧紅日永晚涼
人聚綠陰多愁深莫訝腸如轂力壯居然手挽河機械世情
消不盡慣從平地起風波

暮過南莊示同遊

薄暮偶乘興尋幽入草廬涼生林竹早紅點砌花疏穉子偷
嘗果主人粗解書待當黃菊綻重訪意何如

寄酬焦穉泉先生五十四韻

不到睽離際羣居樂孰知況曾經受益更覺費相思幸得疏
麻遞忙將吟草披纏綿真莫已獎飾轉疑私玉到綠輒引笙
高並管吹哀傷庾開府諷諭白分司律比當年細聲憐此際
悲長吟心欲折感舊意如癡江左流離日淮南邂逅時握衣
才進謁悅服遂從茲自笑痴同嗜誰憐腕近疲清談欣屢接
前席合相咨舊雨開壇坫春風入幕帷敢希呼小友儼若對
嚴師字字求剛改言言互考資微瑕將我指妙說解人頤湜
亦奇長吉郊常侍退之濠梁莊子宅盱邑楚姑祠賞月同興
酒穿雲共訪碑湖隄臨玉鏡泉水弄玻璃兩地雖頻徒三年

總未離方期常捧袂豈料遽分歧蒲酒酬佳節山椒集履綦

傳烽何太急此會渺難追

戊午端陽同集盱山都天廟薄暮卽聞警

聞說高蹤避

都從逆旅羈瓦梁回短策泗水擁皋比余亦扁舟去家從異

地移汜光新水色墟落小茅茨適野謀非左蠲棋勢屢危河

西驚燧火

天長在汜水西

淮浦失藩籬

清江浦

降將狼同野揚州鶴欲

騎

降盜薛小欲窺揚州投高郵被擊遁去

不追仁貴績翻效魏延爲索餉名偏

假稱兵事可疑穽將禽虎豹網突走蛟螭敵患剛教泯天災

又見欺桃花波泛溢瓜蔓水淪漪風雨交相助隄防幾莫支

地原名澤國居況近湖湄半夜譌言起千夫儘力持其魚真

幸免驚鳥直如斯

七月初九夜譌言提決鳩單護救

縱使窮鄉住難將樂土

期事皆關氣數情懶卜龜蓍守我迂儒業憑他野老嗤暇還

將圖學俗或借書醫擊碎竹如意磨穿鐵硯池卽茲消歲月

便可當生涯其奈蹤飄梗何從室入芝琴無同調響商有獨
抽絲出谷空求友驅車鮮問奇每當相憶及不覺信欽遲聊
繕閒居作仍呈長者窺倘能邀斧削應不異追隨香爲南豐
祝神因北望馳秋深鴻雁到珠玉望頻貽

聞島夷陷天津

善策誰諳戰守兼天津財賦失魚鹽風迴滄海波難定火照
甘泉勢更炎鎖鑰關門無寇準主持國計望于謙傳聞根本
京師地戈甲於今正纂嚴

自遣

人生苦爲百年計終朝鬱鬱營財利運命難同造化爭那能
事事如吾意執鞭自昔不可求况復生當亂離世朝爲富室
暮貧兒今日不知明日事縱使黃金白銀高如山保守終身

實不易感此茫茫百不思飽煖飢寒總聽之天既生我任天爲

橙

耐得光陰久天寒總靡宅枝纏緣我翦綿軟任人搓一點酸
心在十分香氣多迴思經雨澤珍重爲移柯

蟹

西風連日響淮河試問雙螯價若何趨火憐他生性熱登盤
共我醉顏酡全無腸肺橫行慣爲有脂膏受累多喜得清饒
今夕解一詩相換仿東坡

放歌四首

寒風颯颯吹屋破明星挂檐如月大
中夜憂思不能臥披衣獨起挑燈坐
丈夫豈合常窮餓牢落風塵偏轍軻
踟躕天踏地

愁無那愁無那心忉忉夜欲曙雞三號拔劍斫地歌聲高
走雖不能及奔馬力雖不能挽強弓平生揣摩五千卷略則
黃石韜太公料天下事屢奇中視賊伎倆掌上同倘使參謀
向帷幄未必不成分寸功況兼一枝琳瑯筆飛書草檄頗自
雄豈若談空說有輩只合束之高閣中茫茫宇宙無知己仰
天吐氣成白虹側聞江淮諸元戎延攬似有名將風我欲杖
策相追從短後袴褶騎黃總軍門長揖誰爲通

水涌必由泉源注木茂必由根本固我家百口渺何處吳越
晉秦各異路吳越烽烟高接天死生消息都茫然晉秦山川
復險峻脂車秣馬愁難進每一念之心煩懣安得聚居安樂
鄉土地膏腴田畝良種以黍稷雜稻粱上爲祖宗供烝嘗
下爲宗族給衣糧其餘親友來我旁盡情施予慨以慷不愁

可園詩存

卷六

十

揮盡黃金黃鳴呼此願何時償

讀書不能救奇窮旁人勸我學老農識字不能免愁苦旁人
勸我學良賈秉耒不知耘與耕握算不知虧與盈學農學賈
皆無成如此迂腐君莫笑富貴從來難逆料力田農雖可爲
水旱畢竟隨天時居奇賈雖可作慢藏亦恐遭奇禍不如潛
心經濟與文章始則困兮終則昌

寄金子鳴先生興化

白社諸詩人分飛如勞燕淮海地相鄰惟君居近縣雖云居
近縣同是未能見相思朔風寒梅花飛片片

可園詩存卷六

另詒綬孫祖同校字

可園詩存卷七

江甯陳作霖伯雨

汜湖草下

起咸豐辛酉正月迄同治壬戌閏八月

閩島夷和議成二首

天子狩河陽戎兵犯朔方
師行時雨緩使走列星忙
鐘簾幸無恙金湯各立防

翠華計日返沾灑望長楊

屈伸中國理柔遠

聖人恩只恐金縢缺重令烽火
昏急須爲久計切勿恃盟言
安得勤王將驅兵斷海門

雨中春望

雨洗孤花明風搖新柳活
欲往前溪行泥濘未能達遙望牧

兒歸蓑衣帶溼脫

無題十二首

舊遊歷歷不能忘惆悵吟成尙自傷太守於今已有婦小姑
當日本無郎蝶尋殘夢園亭冷麝過空山草木香流水東西
十年事花開花落總茫茫

鳳城西去路偏斜繡陌曾逢七寶車偶聚芳蹤成柳絮最嬌
人面映桃花莫愁南國原同里朱玉東鄰況是家欲託琴心
通一語生憎隔院鬧琵琶

風吹花片滿闌干和雪和雲攪作團翠袖低垂寒倚竹綠窗
悄語氣如蘭眉情暗向檀奴遞心事難將侍婢瞞正是晚妝
欲梳裏姮娥捧鏡下雲端

揀得高枝結鳳巢肯將春色等閒拋濃陰未展芭蕉影煖日

遲烘荳蔻苞蜂釀百花能作蜜麟熬獨角漸成膠情衷欲向
香閨訴門掩朱扉不敢敲

春愁無限一身擔鴛裏千纏作繭蠶芳信浪傳風廿四佳期
只盼月初三蓮心剝出翻嫌苦蔗味嘗來不覺甘白紵清詞
歌一曲內人疑是舊何戡

珠簾鎮日總垂鈎懶向春風倚翠樓撮合有山迎對面團樂
無月照當頭鵲巢生怕來鳩占杜匹何堪任雉求幾度沈吟
無可奈對人強笑背人愁

消息傳來究若何如天好事竟遭磨青憐梅子酸心透紅恨
薔薇刺手多雲起陽臺蒸作雨風生古井激爲波綺思瓊想
殊難歇隔院猶疑響玉珂

心頭悶結解難開一半驚疑一半猜七月明河牛女隔百般

下
言
不
一
卷
一
二
蜚語鴉媒來尋常游戲都成識宛轉相思總化灰聞說侯門
深似海蕭郎咫尺已天涯

來如春水去如雲走馬章臺日未曛早識佳人歸吒利何勞
大使散氤氲有心續命求長纓無計留仙挽皺裙滿腹牢騷
多少恨縱然無酒也醺醺

游仙一覺杳難尋壓皺牀頭翡翠衾顛倒衣誰裁紫鳳往來
信已斷青禽縱教天不如人願未必卿無憐我心懊惱芙蓉
圍十丈好花開向碧波深

憶否裴航上玉京藍橋覓杵乞雲英三挑佯許心原慧十索
難償約未成夢已醒時猶說夢情當盡處卻關情揚州小杜
如重到綠樹陰多子亂生

不堪往事話當年過眼風花也是緣樓隔紅塵天尺五舟迴

碧海路三千雲愁霧毒何曾慣鳳泊鸞飄孰爲憐勘破繁華
耽淡寂楞嚴十種卽眞禪

題周還之廣文

葆嫌

邦舟小草

父執幾何人惟君寄同縣蒼頭自城歸攜來詩一卷述事意
激昂言情調流轉爽比哀家黎快過千將劍徐庾氣體華韓
蘇筆力健卽此寸絹中使我雙目眩家君呼來前小子何
淺見管豹偶窺斑河鼠已滿願試爲述生平應更增歆羨金
陵全盛日諸公立壇坫先生周其間文酒接高譙洛下曾青
英梁園集名彥冶山獅窟間到處留華翰泊乎滄桑始蹶起
發長歎男兒生世間當以功名見運籌人許同翻城事立辦
多魚奈漏師冥鴻獨免彈於此欽智略出亡急乘傳內應事洩君獨
免當其在園中狂吟抒憤悶詞向曹唐摹格自玉溪鍊謂小游仙

及無莊子寓言篇屈平離騷怨至今海內人傳鈔幾將徧卽
題詩已未屏山松柏蒼鏡水芙蓉豔觀瀾
却前年冬杭州恣游玩

東海樓沽酒西湖店豈無凌雲毫妙句題黃絹詩藁束牛羣

不知幾千萬若此邦舟草鼎烹嘗一嚮待汝讀旣竟此卷何
妨換賤子聞斯言喜極頻翻看鎮日事吟哦欲釋猶戀戀趙
璧聊歸還棠倉又重盼卒業倘許予敢辭質魯鈍請援私淑
例終身甘北面

集趙氏園亭贈喬壽人

朋

小小園亭短短籬與君此處數相期前遊偏是難忘卻遶竹
閒尋舊刻詩

新竹

雷聲驚破幾分春骨格清奇自絕倫寒碧解將風裏籜軟紅

洗淨雨中塵少年便有淩雲致以下應多借蔭人從此平安
直到老養成勁節配松身

夏晚卽事

苔階何太滑曳履出門遲雨過雷餘怒雲奔月倒馳蟬聲清
似磬蟲聲利於錐賴有微風起當之襟一披

安兒生

豈真抱送釋迦臨乍試啼聲喜不禁得子敢云萬事足添丁
聊慰二人心名花未老紅垂果喬木初成綠有陰獨恨未令
大母見一回追憶一沈吟

夢中作

苔滿空階水滿渠茶香一縷夢回初藤陰日午不知暑斜倚
繩牀臥看書

贈南城饒正香湘并懷焦穉丈

卓犖高才邁等倫西江宗派自清真
翩翩濁世佳公子落落天涯作客身
邂逅因緣同斷梗淵源詩學見傳薪
歸時試向紗幘說舊社荒涼少替人

晚望二首

野色蒼茫落日圓晚來憑眺倚門前
餘糧儘許羣雞啄生客頻驚小犬眠
紅字書牆開酒市黃雲塞港運租船
繪成一幅田家樂不入秦源也是仙

屋角炊烟幾縷微誰家晚飯徹柴扉
風如緊處亂鴉下雲忽明時一鷺飛
更得鮮魚攜網去童驅烏犢打場歸
閒來欲約東皋子醉後長歌懷采薇

夢登萬山中有一閣榜曰臥雲賦詩而醒急起寫之

萬峰上無巔行行蒼翠匝高空一閣懸霽景窗中納天迴日
孤圓山深雲四合磬聲落諸天鈴語響空埕禪味倘可參吾
將尋老衲

從軍行夢中作

風聲來大野霜氣壓邊城黯黯雁南度蕭蕭馬北征別離今
日況辛苦十年情前路逢知己龍泉腰下鳴

歲暮雜感五首

人生貴卓立依附適足羞各自闕其路不必相爲謀曠觀天
地間此理不外求白日從西逝黃河向東流

雕籠養鸚鵡巧言百樣新飼以珍珠粒檐下甘寄身天外黃
鵠過哀鳴何酸辛大河三日凍不得啄紫鱗飢寒毛羽瘦對
之氣不伸餓死乃本分不復能媚人

中庭有奇樹百鳥巢其顛含哺復孕育不知幾何年胡爲惡
聒噪斧斤相尋焉庇蔭一以失百鳥散翩翩須知枝葉剪根
本遭顛連雨淋日又炙外患相熒煎始悔此計謬物我兩難
全回視向日鳥高飛入青天

勁風摧樹林落葉淨如掃霜欺兼雪壓生意幾莫保豈知抑
鬱久根盤節已老陽春氣一迴欣欣向榮早雨露發華滋定
較今年好守分以待時眼前且枯槁

雪滿太行坂騏驥服鹽車一步一顛躓驚馬無差殊圉奴不
相識鞭箠使馳驅一朝過伯樂奮首仰天呼朝飲葱河水夕
食玉山芻棧豆何足戀去去千里途

醉司命辭

臘鼓喧夜如年雲車駕神朝天千門萬戶祝富貴柏葉釀酒

浮香泉獻神一厄神駐轡恕我書生不善媚神縱酩酊應無妨世事無憑天亦醉

湖村樂四首

六言

雪消新水漸綠雨過遠山更青芳草生連官道亂花圍住溪亭

船乘落日齊泛水遇微風不波楊柳岸邊陰滿芰荷深處香多

牧兒吹笛未返鄰叟提壺已歸水落鮮魚可拾霜高團蟹初肥

滿天雪意漸厚捲地風聲倍驕沽酒扶筇入市訪梅策蹇過橋

觀劇口號

可園詩存

卷七

豁開眼界水雲寬底事偏將傀儡看舉世悠悠懶酬對此中
猶有古衣冠

送家大人赴鎮江戎幕二首

拔劍悲歌躍馬行問 爺何處請長纓金山春冷南朝寺玉
壘宵嚴北府兵談笑居然趨虎幄別離未免觸烏情見心直
逐邗江水送過瓜洲古驛程

從古文章不療貧天涯莽莽況風塵軍書幾處方旁午家計
頻年最苦辛只爲守株難待兔何妨投筆盼圖麟恐增內顧
無窮慮不敢臨歧淚灑巾

夜聞大風

萬籟無聲際風威忽地狂月沈半夜黑沙捲一天黃垢定羊
羣夢箕誰鳥翼張感時思將相予意正茫茫

怨歌行五首

我本江南流離子
蘭足荆榛走萬里
詠茅卜築汜湖邊
著述文章頗自喜
門外蒼苔三尺深
五年足不履城市
吁嗟乎蛟龍蟄伏能幾時
春雷一動雲雨隨

東鄰西鄰四五家人情輕薄如秋紗
背面相傾當面好今日許諾明日差
悠悠舉目怕酬對杜門漫將高尙誇
吁嗟乎風塵倘得一知己此心可以無恨矣

我有萬言晁董策高談雄辯莽無敵
下論軍餉上論兵種種弊端宜變革
欲獻軍門不得通旁觀見之皆咋舌
吁嗟乎北望清淮大將營不知誰是曹邱生

南有維揚北有淮
紛紜羽檄交相催

壬戌三月十二日北燃由高良澗涉湖窺寶應

是時粵賊亦犯揚州

此邦岌岌如累卵
塵氛眯目不可開
我欲移家樂

土去空空妙手無餘財吁嗟乎紇千山頭凍殺雀安得飛向
生處樂

古來儒術崇先達誰知今變師之困硯田有稅不能收涸轍
枯魚待江潤甕中無米突無薪一家餓死誰相問吁嗟乎男
兒此筆何不投一投便封萬戶侯

黃將軍

國瑞

湖灘殺賊歌

洪澤湖梢湖水竭日射新灘泥半裂左右相違賊竟越重湖
偷渡無人防狼如豺虎貪如羊誰其擊者將軍黃一戰再戰
賊鋒挫斗大孤城不得破賊退仍從湖裏過黃風漠漠天爲
低沙塵著地不見泥賊騎飄瞥渡河西天崩地塌砉然響泥
淺及胸深及頰將軍聞之率兵往礮聲轟震青天高泥中出
沒賊爭逃揮刀殺賊膽氣豪輜重奪取無不有大者牛羊小

雞狗馬鞍纍纍懸賊首吁嗟乎將軍此功湖所成安得湖中
春水生一湖賢於十萬兵

積雨

三日茅檐雨春光又送過花紅落地碎苔綠上牆多竈小烹
泉熟韭香調麪和貧居雖寂寞傍午有雞歌

早行至晏家河

殘月忽墮水疏星猶滿天起當雞唱後出在鳥飛先沙軟塵
難起橋危板不全呼人問前路驚破曉溪烟

送妹夫周浦雲貳尹從軍鎮江三首

君才萬里可橫行況是京江數日程島近孫盧猶匿迹檄成
琳瑯正從征屈身羞就哦松職挾策先干細柳營家計支撐
良不易行行豈獨爲功名

家君折柬遠相呼，甥館遙知笑語俱。
借爾口中傳娓娓，爲予膝下達區區。
讀書幼弟寬鞭策，學語嬌兒解唯俞。
母妹平安勤儉慣，免教客裏費踟躕。

從來有志事終成，馬首遙瞻鐵甕城。
名勝山川朝載酒，森嚴帷幄夜談兵。
淩烟高閣看君畫，暮雨輕帆動我情。
恨煞儒冠相累久，不能杖策竟隨行。

同治元年五月紀事四首

龍飛九五萬方崇，日月重光表

帝功。高后垂簾堯舜出，成王輔政召周同。
黃巾平賊期諸將，藍面除奸賴

兩宮。野老傳聞皆感泣，

詔書果有

世宗風

聞說西洋異種多衣冠爭欲襲峩峩域中罌粟空無瘴海上
風濤靜不波

廟算攻心原有術花門勞面自求和共言中國

聖人出助順兵來舞短戈

河濟江淮偃戰旗豐功盛烈卻歸誰中興元老周方叔

曾協揆

異姓名王郭子儀

鄂僧

半夜星占天狗落四邊火促釜魚危石

頭城外長圍築故國人民繫我思

念家山破度新聲彈指星霜荏苒更大地兵猶張柳幕江南
哀自賦蘭成十年飄泊鄉園夢入口流離骨月情盼得機槍
皆掃盡青山深處好歸耕

聞曾帥大兵下江南誌喜七首

可園詩存

卷七

九

龍蟠兼虎踞建業古雄州地利連吳楚星文應斗牛十年偏
不靖半壁有誰收近喜裴中令旂麾擁上游

羽扇綸巾度書生韜略多一身兼將相萬里定干戈
天部前鋒曳落河軍聲今已振何必借沙陀

四節總旌旄

公有節制四省軍馬之命

聞風賊盡逃戍猶留夏口民不

犯秋毫甘苦同諸卒恩威服眾豪

李苗二練奉令惟謹

王師誰敢抗一

路勢滔滔

六道戈船發旂開五色幢揚帆過鵲渚乘勢下龍江鐵鎖難
憑險紅旛定豎降奪將天塹隘自足制南邦

金鼓從天降偏裨盡異才共傳細柳寨已據雨花臺窮賊漸

無食諸軍解散財

難民皆給路費轉輸知不絕江上米船來

上相初專閫江南已望君

丹墀曾議禮

咸豐初公以議禮廟體受文宗知

墨經不從軍

公居喪三廬疏請終制

下勅薨采崑岡玉石分純臣真第一豈獨號元勳

正正復堂堂聲威不可當令行九節度圍合百重牆陣已長

蛇布奔須困獸防寄言北府將整眾截丹陽

夏日題詹小亭

保泰詩稿

何處清風至穆如吹葛襟把君詩在手憐我癖同心迂腐招

人笑艱難閱世深會當乘月訪相與縱狂吟

哭姑祖周范亭先生三首

壽考七旬近兒孫四世俱稱心諸事足回首片言無朝露歌

香薤靈風響落梧料將濠上月悲啼泣慈烏

平生重文字與我最綢繆卽到言前抱依然禮數周聞聲輒

相喚欲去又頻留從此微言絕空庭冷月秋

患難蒙相恤光陰倏九年
家君今遠出小子倍承憐
紅粟時分米青蚨月給錢
朝來難舉火掩淚拜靈前

可園詩存卷七

男詒紱孫祖同校字

可園詩存卷八

江甯陳作霖伯雨

京江草上

起同治壬戌閏八月迄癸亥四月

赴鎮江從軍途次作

仰天大笑出躍馬未曾停劍跳雙丸白氈辭一片青駒行休
戀棧鯉對藉趨庭時家君亦在鎮江從此金山頂江聲日夜聽

高郵道中

魚鱗細浪綠參差下水船行不覺遲遙望紅牆叢樹裏舟人
道是露筋祠

東馬頭防汛處夜坐有感

山城路遠不聞笳獨坐深宵月未斜筆禿題詩多帶草酒酣
看劍易生花地當僻靜幸無警人到清閒便憶家自笑迂儒

可園詩存

卷八

無偉略強從戎馬覓生涯

由象山渡泛舟至焦山

吳楚諸名山一路看不了自從陵谷遷勝蹟皆難改惟此焦
仙居林巒依舊好我夙夢見之今晨遂幽討獨步象山根問
渡人多少逆風強使帆折成之字巧閣影倒江空鐘聲入雲
杳千章樹木濃雨點松簷小倏忽登層崖路向晴嵐繞抖擻
塵埃衣行行尋幽渺

飯焦山書院贈明秋和尚

禪房探勝處香積飽齋時卓錫真仙地遊山得導師止觀心
是佛信口偈成詩欲把機鋒悟木樨香在斯

入定慧寺

江中望焦山山深不見寺及沿江岸行始踐祇園地護法龍

象嚴凌空鸞鳳麗方丈轉東廊禪房此位置紅欄曲可循綠
竹疏有致頂禮罷佛參合十逢僧至指我認碑銘導我觀彝
器莫辨王陶書抗希周漢世寺有瘞鶴銘及周鼎漢爐諸葛銅鼓平生好古心
於茲幸稍慰千年一刹那悠然悟禪意

由海不揚波亭舊山門取道上山經雷轟石訪三詔洞遂至
吸江亭

言出人勝坊山門留廢址壁閒擘窠書欲搨苦無紙壁嵌海不揚波
四大舍之東南行登山自茲始愈轉路愈幽崎嶇不容趾磴
道穿薜蘿籬籬接棘枳削立半邊崖洶湧一江水帆影在目
中濤聲走腳底鶴銘舊曾存蝸廬前卽是遊倦小勾留心殷
猶仰止努力登高亭雙峰相對峙

登焦仙嶺絕頂放歌

一堆怪石江心出鎖鑰海門真突兀北固金山天際看屹立
三峰成鼎足長江萬里巴蜀來到此居然一約束我今訪勝
來林邱雲物風濤望裏收天光水光混一色不知誰是天盡
頭片帆破浪疾於馬巨艦浮波輕似鷗西望金陵東海滬一
帶模糊指煙樹烽火於今尚未銷徘徊盡是傷心處安得習
流十萬水犀軍登壇號令旌旗新沐日浴月施巨手洗盡江
南戰伐塵然後一邱一壑從吾好醉倒深山看白雲

北固山尋甘露寺廢址遂登望江亭

孤亭卓立勢崑堯古寺曾經劫火燒頂上九層留鐵塔眼前
兩點指金焦孫劉石跡埋荒草吳楚江聲走暮潮賸水殘山
增感慨興亡何必弔前朝

金山二首

第一山川勝憑虛曠望通江帆盪雲白海日突波紅半段豐碑古千尋佛塔空滿山皆瓦礫憑弔向秋風

妙高臺上立法海洞中過深窟穿龍腹危亭懸鳥窠風聲如此大山色不嫌多借問禪棲客坡仙帶若何

金山軍營侍 家大人夜話

金山秋氣肅雄師正是戎帷省覲時半夜霜高驚戍鼓一江風緊颭牙旗軍書看起陳琳草家法親傳孔鯉詩情緒滿腔不成寐坐聽戰馬嘶枯萁

銀臺山訪觀音洞

拾級登坡陀一洞鑿山腹石扉訇然開因勢以爲屋過雨氣陰森捫壁苔斑綠摩豁面大江江帆來斷續應有慈悲航憫然拯流俗

火輪船歌

聖人御世同羲軒包舉四極撫八垠泰西有國近夕暎形畧
似人捷猿狖禿襟小袖緊縛禪連蜷須短赤眼暖疇人善算
窺星垣累黍不失窮流源波斯列館通譯言機心一動機事
繁有船巧製尤新翻中列層樓外啟門巍然不動熊虎蹲六
月暫息化鵬鯢粉白塗轂髹漆輻以氣煽火火漸燔輾轉暗
轉絃調鷗桔槔低昂疑灌園銅花遶柱偏其反犂犂響起車
鳴轆轤無簞第圍無帑指南有鍼古制存煮水去鹵傾滿盆
輪外大海流渾渾迅疾如馬不用韃山移鼇足梁浮鼉次且
行笑无膚腎離上坎下旋乾坤配合二氣丁壬婚激水飛騰
萬里奔風信不問偃旗旛沖天一道青煙痕行止吹角異簾
塢居奇大賈侈自尊食前方丈羅腥膻金波細酌琥珀醇坐

誇奇技勝中原我思制器示後昆匠氏竭智戒素飡法遵輪
輒導崑崙蕩心皆以淫巧論此船遺式誰所驚楊么倡亂湖
中屯岳侯臨之氣欲吞夾江小港塞草根誘彼深入取其元
破亦甚易無外援方今瀛海塵不昏

聖德如天覆頂跟昆蟲鳥獸皆承

恩肯從小醜修舊怨漢將連營笳鼓喧三韜六略談吳孫坐
鎮心靜無煩冤江湖來往客遊魂盟成久息噴言煩炎炎不
滅待自焚歌成有舌幾欲捫誰爲采之遄

天閣

軍中小樂府五首

兵勇苦

兵勇苦白晝查街夜擊鼓賊將來出隊伍賊已來守牆堵倘

可園詩存

卷八

四

非謀衣食僕僕何所取誰知入少出者多妻孥累重將難撫
終朝愁歎無計施今日胡爲笑且語爲言新自糧臺來本月
關銀仍是二兩二錢五

升遷速

升遷速奮勇者榮怯者辱

朝廷爵賞破格懸但有微功無不錄巍然圖畫在雲臺不論
降人及賤役芝草無根醴泉無源貂蟬總自兜鍪出君不見
堂堂幕府協戎來獨領一隊旌旗開今日巴圖魯前日當上

差營中謂跟丁
爲當上差

官爵濫

官爵濫風塵滿面須眉暗衣不掩脛泥沒肝肩上橫擔槍半
段拾得柴薪供午爨奔走疑爲行腳漢旁有識者笑失聲如

此官員慎勿輕戴藍翎頂水晶

佔民房

佔民房深穿曲室坐華堂斫我園中樹折我屋旁牆鮮衣怒
馬入門去中庭開宴樂未央可憐地主求恩庇獨居廊廡身
如寄半夜憂愁不能睡明日須交開架稅

割馬草

割馬草大將軍營須芻藁刈以鎌刀束以繩一半禾稈一半
稻農夫辛勤幸及秋賊兵未擾官兵擾劇憐抵死向前爭刀
背砍之不敢惱安得將身化作千里駒伏居樞下終年飽

九月二十六日作

家中久望爺歸去今日應歸汜水濱遙想迎門無別語一齊
先問未歸人

悼安兒三首

憶汝四十日胸無片刻寬明知病不起常把淚偷彈噩耗一朝得書緘再四看從茲予望絕轉覺夢魂安

猶憶曇花現聰明實可誇貪眠常惱母索抱每呼耶豈料兒辭世偏逢我別家垂危幸不見免得倍傷嗟

痛極翻無淚人難與數爭須知今已死祇若昔無生愁縱難排遣心宜判重輕高堂方念我不敢過傷情

閨情六首

春風十幅蕩羅裙妾在深閨郎在軍妾性定如古井水郎心幻比出山雲

流蘇寶帳合歡鉤曉起支頤淚暗流夢裏分明與歡見不知歡可夢儂不

綠雲委地滑於油雙鎖眉峰點點秋膩粉濃脂久不理生憎
小婢勸梳頭

人前笑語強綢繆日在愁中不露愁翻傲舊時諸姊妹儂家
夫婿覓封侯

賺儂夜夜守空房屢誤歸期卻惱郎萬一今宵真箇返臥時
不還解衣裳

酸憐梅子初生日甜是櫻桃爛熟時說與旁人渾不解自家
甘苦自家知

次詹小亭見懷韻

別君三百里汗漫孰同遊浪作諸侯客來尋多景樓山川增
感慨風雨憶朋儔極目江天望青峰數點稠

長至前一日來金山軍營夜半大雪曉起登絕頂作歌

既不肯學深山隱煮茗高居太白嶺又不能提常侍兵銜枚
直入蔡州城胡爲乎江天夜半三尺雪身向金山戎幕歇曉
來四顧玉玲瓏手拍崖肩呼快絕水天一色大江東南徐山
影煙濛濛雲埋壞塔千尋黑風颭牙旗一角紅平生足不出
城市到此方知天地空昨因省視來軍次忽得奇觀天下最
況當長至一陽生相逢盡說豐年瑞天意留人不許回何妨
玩賞共銜杯酒力迎風不知冷狂吟又上妙高臺

自金山踏雪至北固山軍營訪周浦雲

雪滿不知路但隨人跡行濃雲混山色新水作江聲纔轉南
徐郭旋登北固營款然見之子一夕慰離情

次顧子湘一瀟吸洋煙韻

吞火非無訣傳燈亦有緣捧來盤比玉懸起帳如煙幾輩能

防口誰人不聳肩
撚丸憑素手吸氣達丹田
肯失朝朝約權
教事事捐
蜚魂清入夢
鶴骨瘦登仙
到處聯牀契
居然不夜
天此交真耐久
足可號忘年

軍中感懷

鐵甕古時城
紅旗上將營
一身初作客
十載未休兵
艱窘謀
衣食飄零感
弟兄壯懷銷
欲盡空聽寶刀鳴

訪象山洞

暇時偶作象山遊
月榭風廊土一邱
故老至今猶指點
京江相國讀書樓

冬霽山行

徑路轉逾深
梅花何處尋
日光照不到
積雪半山陰

月夜循象山岸望江

可園詩存

卷八

七

水天萬象總澄鮮
皓魄多情爲我圓
半夜風濤衝石岸
幾星燈火泊江船
眼窮空闊應無界
身但安閒不羨仙
獨恨一灣衣帶隔
未能乘月訪焦先

中庭夜步

良宵不忍負
起步下虛堂
風大江聲近
月斜人影長
鼓笳喧近郭
鐘梵冷禪房
春意誰先覺
梅花一縷香

風雨泛江

岸闊霧冥冥
乘風駕小舲
雨沈一江黑
雲截半山青
揚簸糠中米
飄流水上萍
余生能涉險
忠信養心靈

山行

仰望最高山
磊落多怪石
初疑不可上
徑路荒難闢
忽從半空中
露出一綫白
螺旋而蟠盤
知是人行迹
余亦緣之登
置

足不暇擇竭力陟層巔汗出如漿液是時方嚴寒科頭脫巾
饋家居豈不安苦爲飢寒迫三復黍離篇喟然感于役

除夕書懷

一年容易到今辰無限風雲變局新歲暮多愁緣作客家貧
爲養轉離親不堪別緒生中夜曾把歸期約早春料得殘年
猶未盡倚閭已自望征人

癸亥正月十四日大風自焦山口渡江

如此風波惡居然鼓棹行碧山屹若柱白浪沸如羹路遠歸
心急時危性命輕移時登彼岸午日漏雲晴

贈內

半年相別一朝逢子職勞卿代爲供婉婉不違慈母訓儉勤
漸習我家風朝餐白粥安儒素夜對青燈課女紅內顧免予

多少慮鹿車會挽向江東

界首驛遇周浦雲歸汜水

我已戒途至界首見君船頭亂招手無心相遇喜不禁借問
幾時出京口

卽事

春風吹到杏花村日日嘗新載酒樽第一江南好風味嫩蒭
鮮筍煮河豚

贈楊芝亭

光祖

十載同遊舊弟兄入門一笑遠相迎乍看猶識當時面久坐
同談近日情江上孤峰方熟翠南中二月已聞鶯春光大好
休孤負會買扁舟訪海瀛

時君寓
焦山

病起二首

偶然示病學維摩。丈室深居少客過。半榻茶香人意懶。一簾
花影鳥聲多。愛聽魚磬清凡慮。時寓佛菴小有琴書遣睡魔。調攝
何須參與尤。谷神終日養沖和。

曉起驚看日上竿。無言獨自倚闌干。羹湯斟酌酸鹹易。衣服
調停冷暖難。膚垢積將三寸厚。腰圍減卻幾分寬。新詩一卷
聊吟咏。當作枚乘七發看。

咏枕

送我還家感爾恩。幾回好夢耐思存。縱教垢膩休輕浣。盡是
思親積淚痕。

望江

獅象兩山蹲

焦山一
名獅山

江流互吐吞。春潮來有信。夕照淡無痕。

夷舶成通市。漁家聚小村。水仙何處去。一笑弔孫恩。

觀兵

將壇旗幟似雲屯
五百親軍擁護尊
忽聽馬蹄聲不斷
元戎督隊出西門

鎮江感事三首

孤城俯瞰大江寒
十萬貔貅擁將壇
寇騎蒼黃朝插羽
豪家赤白夜探丸
治軍須以戰爲守
行政誰將猛濟寬
楚尾吳頭煩劇地
才兼文武古來難

世亂年荒處處皆
災黎滿目觸悲懷
吹簫伍子飢難度
荷鍤劉伶死便埋
縱有捐金輸幕府
那能運粟濟江淮
轉機惟望青青麥
可奈連旬積雨霾

京江形勝集舟車
聞道西洋欲置衙
自有蜃樓通大海
非聞馬市獎中華
越裳南服方輸貢
博望天河自泛查
莫道和戎

非上策軍租多少助官家

鎮營竹枝詞三首

山頭小小一營盤
卡子門開夜月寒
知是明朝須出隊
三更三點下傳單

逢三逢六最匆忙
演武齊臨大教場
五色旌旗忽不見
狼煙先放一排鎗

娶得妻兒人口增
四天只領米三升
除非省卻營夫費
郎去常差妾守棚

江鄉

江鄉容小住終日
踏清塵山石奇於獸
麥苗高過人村燒
猶有屋廂破若無神
遠望青煙起夷船
走火輪

遊焦山五首

小別焦岩已半年暇時乘興泛輕船大江徑渡平於掌舊雨相逢笑拍肩

謂楊芝亭

地隔烽煙真是福山當縹渺直疑仙何當

擺脫紅塵累鎮日蒲團學坐禪

石坊萬仞勢凌空龍象森嚴護梵宮滿院陰添慈竹綠雙銀靜掩法門紅參禪老衲容偏古刻石名流字盡工我有新詩欲題壁誰能親爲碧紗籠

邇迤山形似伏龜行行曲折總忘疲層坡疊石高無礙叢樹臨江險不知鐘歇上方朝課了煙生下界午炊遲此中佳處真堪隱倚杖閒吟蘇老詩

孤亭絕頂俯屢屐一覽江天有所思古蹟難尋留冢鶴童謠

已驗剝皮獅

道光中焦山半塌而象山根砌磚岸謠云獅子剝皮象則是鎮江城裏遭殺戮

山川控

帶通吳楚樓閣參差佳島夷

松寥閣自然庵皆爲夷踞

閉口怕談當世事

獨穿苔徑訪焦祠

歸途重過別峰庵
天宇陰森樹木參
捷徑只容樵子步
因緣愛與老僧談
自從烽火離鄉國
何處香煙問佛龕
今日暢遊成一笑
名山畢竟在江南

可園詩存卷八

男詒紱孫祖同校字